

**«UDRUŽENJE ESTRADNIH IZVOĐAČA
ZE-DO KANTONA»**

S T A T U T

**«UDRUŽENJA ESTRADNIH IZVOĐAČA
ZE – DO KANTONA»**

Zenica, 09.03.2004. godine

Na osnovu čl. 12. Zakona o udruženjima i fondacijama («Sl. novine F BiH br. 45/02»), Osnivačka Skupština «Udruženja estradnih izvođača ZE-DO Kantona» koja je održana dana 09.03.2004. godine, u s v a j a:

S T A T U T

«UDRUŽENJA ESTRADNIH IZVOĐAČA ZE-DO KANTONA»

I. OSNOVNE ODREDBE

Član 1.

Ovim Statutom uređuje se: naziv, sjedište, područje na kome ostvaruje djelatnost «Udruženje estradnih izvođača ZE-DO Kantona» (u daljem tekstu: Udruženje), status i djelovanje estradnih izvođača, estradnih umjetnika i samostalnih estradnih umjetnika, programski ciljevi i sadržaj djelatnosti Udruženja, zastupanje i predstavljanje Udruženja, pravni status Udruženja, poslovanje sa privrednim licima, organizovanje i posredovanje u javnom izvođenju estradnih programa i druga pitanja od značaja za estradnu djelatnost.

Udruženje je strukovna organizacija koja se bavi estradnom djelatnošću na području ZE-DO Kantona, osnovana radi zadovoljenja ličnih i zajedničkih interesa članova Udruženja, radi vršenja određenih društvenih poslova i ostvarivanja svojih interesa i prava, dužnosti i odgovornosti u usklađivanju širih zajedničkih interesa sa općim društvenim interesima, iz oblasti kulturnih i umjetničkih vrijednosti čiji je sastavni dio estradna djelatnost.

Udruženje, kao strukovna organizacija, djeluje radi ostvarivanja zaštite prava i obaveza estradnih izvođača, ostvarivanja njihovih zajedničkih ciljeva i unapređenja estradne djelatnosti.

Pod estradnom djelatnošću podrazumjeva se pripremanje i javno izvođenje muzičkih, humorističkih, folklornih, artistskih, književnih, dramskih i drugih kulturno-umjetničkih i zabavnih programa.

Estradna djelatnost se može obavljati samostalno u vidu zanimanja ili kao dopunska djelatnost.

II. NAZIV I SJEDIŠTE

Član 2.

Naziv Udruženja je: «Udruženje estradnih izvođača ZE-DO Kantona».
Sjedište Udruženja je u Zenici, «AMUIP» d.o.o. Zenica, Ul. Vatrogasni put br.3.

Udruženje djeluje na području ZE-DO Kantona.

Udruženje ima svoj amblem u vidu notnog sistema sa violinskim ključem i notnim oznakama sa utisnutim nazivom: «Udruženje estradnih izvođača ZE-DO Kantona».

Član 3.

Udruženje ima svojstvo pravnog lica sa pravima i obavezama koje mu pripadaju na osnovu Ustava i Zakona.

Član 4.

Udruženje ima pečat okruglog oblika prečnika 3,5 cm sa tekstom: «UDRUŽENJE ESTRADNIH IZVOĐAČA ZE-DO KANTONA».

Udruženje ima i mali pečat za finansijska dokumenta sa istim tekstom i obimom prečnika 2 cm.

Udruženje ima štambilj četvrtastog oblika veličine 4 x 2 cm sa tekstom: «UDRUŽENJE ESTRADNIH IZVOĐAČA ZE-DO KANTONA».

Član 5.

Udruženje sa ostalim Udruženjima u F BiH i Republici Srpskoj konstituše Savez Udruženja estradnih izvođača Federacije BiH i Savez Udruženja estradnih izvođača BiH.

Svoje delegate u izvršnom tijelu Saveza Udruženja delegira putem svoje Skupštine, a na prijedlog Predsjedništva Udruženja.

Udruženje može na osnovu odluke Skupštine da se udruži i u druge organizacije, društva i asocijacije, koje se podudaraju sa osnovnom djelatnosti Udruženja, uz saglasnost te organizacije, društva i asocijacije.

Član 6.

Rad Udruženja je javan.

Javnost rada se ogleda kroz:

- a) Informisanje članova i javnosti o svim pitanjima o radu Udruženja i njegovih organa
- b) Izdavanje biltena i drugih publikacija Udruženja.

Član 7.

Udruženje zastupa i predstavlja predsjednik Predsjedništva Udruženja i zamjenik (dopredsjednik) Predsjedništva Udruženja.

III. OSNOVNI CILJEVI, ZADACI I DJELATNOST UDRUŽENJA

Član 8.

Osnovni ciljevi, zadaci i djelatnost Udruženja su:

- da «Udruženje estradnih izvođača», kao dio društvene zajednice sa određenim pravima i obavezama, svoje aktivnosti i pitanja iz društvenog organizovanja života i rada rješava i usaglašava u skladu sa stavovima ZE-DO Kantona;
- da radi na obrazovanju i vaspitanju svojih članova kako bi se oni kao estradni izvođači uspješno bavili estradnom djelatnošću;
- da razvija informisanje unutar Udruženja putem informacija, izvještaja, zaključaka, biltena i slično, te putem sredstava javnog informisanja, umjetničkih i drugih djela;
- da organizovano djeluje na razvoj i kvalitet estradnih nastupa;
- da se putem estradne djelatnosti zadovoljavaju potrebe građana za kulturno-zabavnim i rekreativnim sadržajima i doprinosi raznovrsnosti oblika i sadržaja kulturnog života;
- priznavanje svojstva estradnog izvođača, estradnog umjetnika i vrhunskog estradnog umjetnika;
- vođenje evidencije estradnih umjetnika i izvođača;
- davanje mišljenja i odobrenja u skladu sa Zakonom;
- donošenje rješenja i izdavanje uvjerenja, potvrda i drugih isprava o činjenicama o kojima odlučuje ili vodi evidenciju;
- saradnja sa drugim organizacijama na teritoriji djelovanja Udruženja, okupljanje omladine i građana u svrhu obrazovanja i stručnog uzdizanja na polju estradne djelatnosti;

- rekreativne, kulturne i sportske djelatnosti;
- ostale zabavne djelatnosti;
- stručno obrazovanje i usavršavanje članova na ostvarivanju što boljih uslova za nesmetano obavljanje stručnog rada svojih članova, da zastupa i štiti njihove obaveze i prava, te usklađuje interese članova Udruženja sa interesima zajednice;

da udruživanjem u Savez Udruženja estradnih izvođača Federacije Bosne i Hercegovine i BiH, u skladu sa svojom djelatnošću, putem dogovora i programa ostvaruje saradnju u zajedničkim interesima i potrebama na polju međunarodne Saradnje;

- da radi na pripremanju, ugovaranju i organizovanju estradnih programa, izvođenju muzičkih djela i drugih aktivnosti u skladu sa ovim Statutom.

Član 9.

Udruženje putem Radne zajednice obezbjeđuje svojim članovima pravo na radno angažovanje /estradnu djelatnost/, zavisno od mogućnosti plasmana izvođača i potreba na području svog djelovanja.

Član 10.

Udruženje ima pravo i dužnost da okuplja:
 Vokalne soliste, instrumentaliste, pop rok grupe i druge ansamble, muzikologe, kompozitore, autore tekstova, muzičke aranžere, kao i lica čija je djelatnost i poziv vezano uz djelatnost Udruženja, a to su:
 Konferensijei /voditelji programa/, reditelji, muzički producenti, ton majstori, disk džokeji, humoristi, muzičke i plesne agencije, te da kod njih razvija i podstiče umjetničke, kulturne i moralne kvalitete kulturno-društvene djelatnosti na estradnom polju, kao i da se u okviru postojećih propisa brine o ostvarivanju izvođačkih prava svojih članova, o njihovom socijalnom osiguranju, kao i o drugim pravima koja proizilaze iz rada po osnovu rada.

Član 11.

U cilju efikasnog ostvarivanja svojih prava, dužnosti i odgovornosti, te svoje uloge u društvu, Udruženje može:

- raspisivati konkurse u svrhu daljeg razvoja i propagiranja kulturno umjetničkih i društvenih djelatnosti na estradnom polju i djelatnosti vezane za nju;
- organizovati stručna predavanja, seminare i slično u cilju osposobljavanja i uzdizanja svojih članova;
- organizovati Poslovnicu za obavljanje poslova u interesu članova Udruženja;
- osnovati diskografsku kuću, radio i TV stanicu, u skladu sa Zakonom;
- osnovati privredno društvo, u skladu sa Zakonom;

Član 12.

Udruženje je dužno da aktivno učestvuje u predlaganju donošenja odgovarajućih propisa, te da prezentuje svoje mišljenje Kantonalnom Ministarstvu za obrazovanje, nauku, kulturu i sport, u cilju statusnog poboljšanja estradne djelatnosti.

IV ČLANSTVO UDRUŽENJA

Član 13.

Član Udruženja može postati u Zakonom i Statutom Udruženja predviđenom postupku pod jednakim uslovima svaki građanin sa prebivalištem u ZE-DO Kantonu koji se bavi estradnom djelatnošću.

Član 14.

Članstvo u Udruženju može biti:

- a) redovno
- b) počasnno

Član 15.

Redovno članstvo se stiče na temelju ličnog zahtjeva koji se podnosi u pismenoj formi Udruženju.

Uz zahtjev se podnose sva dokumenta propisana Pravilnikom o priznanju svojstva estradnog izvođača, estradnog umjetnika, vrhunskog estradnog umjetnika i samostalnog estradnog umjetnika.

Po zahtjevima, stručna komisija Udruženja donosi rješenje o prijemu.

Protiv rješenja stručne komisije Udruženja, može se izjaviti žalba Predsjedništvu Udruženja.

Član 16.

Redovni članovi su lica koja ispunjavaju uslove predviđene ovim Statutom, uz uslova da su navršili 15. godina života, te da se bave profesionalnim radom na estradnom polju, tj. da imaju svojstvo samostalnog estradnog umjetnika, kao i lica koja se povremeno bave estradnim radom kao dopunskim zanimanjem.

Počasni članovi su lica koja imaju posebne zasluge za razvoj estradne djelatnosti uopće.

Član 17.

Redovnim članom se postaje danom pravosnažnosti rješenja o prijemu u članstvo Udruženja.

Počasne članove imenuje Skupština Udruženja svojom odlukom na prijedlog Predsjedništva Udruženja.

Članovi Udruženja u skladu sa normativnim aktima Udruženja mogu steći svojstvo: estradnog izvođača, estradnog umjetnika, vrhunskog estradnog umjetnika i samostalnog estradnog umjetnika.

Udruženje vodi evidenciju svojih članova.

Član 18.

Redovni članovi Udruženja imaju jednaka prava, obaveze i odgovornosti.

Redovni članovi Udruženja imaju prava i dužnosti:

- da biraju i da budu birani u organe Udruženja;
- da redovno plaćaju članarinu;
- da se savjesno pridržavaju važećih propisa i svih odluka organa Udruženja;
- da odgovorno i savjesno rukuju imovinom Udruženja;
- da redovno rade na svom stručnom usavršavanju;
- da svojim postupcima ne narušavaju kodeks i ugled estradnog izvođača Udruženja;
- da uzimaju aktivnog učešća u akcijama na razvijanju i propagiranju kulturno-društvene djelatnosti na estradnom polju, putem djelovanja iz svojih sekcija;
- da čuvaju i štite interese Udruženja i njegovih organa;
- da odgovorno, savjesno, pravilno i na vrijeme izvršavaju dužnosti dobivene od strane Udruženja;
- da se u cijelosti pridržavaju odredaba ovog Statuta i drugih akata Udruženja;
- da ostvaruju druga prava i dužnosti u skladu sa Zakonom i ovim Statutom;
- da rade i doprinose na sprovođenju društvene samozaštite.

Član 19.

Svaki član Udruženja dobija člansku knjižicu Udruženja i treba svoju djelatnost da obavlja preko Udruženja u skladu sa Zakonom i drugim važećim aktima i odlukama Udruženja.

Član 20.

Članstvo u Udruženju prestaje:

- a) dobrovoljnim istupanjem iz Udruženja;
- b) smrću člana Udruženja;
- c) isključenjem iz članstva Udruženja zbog povrede odredaba čl. 18. ovog Statuta i odlukom Predsjedništva;
- d) neplaćanje članarine u trajanju od godinu dana;
- e) prestankom bavljenja estradnom djelatnošću;

V ORGANIZOVANJE U UDRUŽENJU

Član 21.

Delegatski princip je osnov za izbor delegata u Skupštinu Udruženja poštujući teritorijalnu zastupljenost svih općina ZE-DO Kantona.

Član 22.

Sva prava i dužnosti u Udruženju, članovi ostvaruju neposredno preko delegata u Skupštini, kao i u drugim organima Udruženja.

Član 23.

Odluke i zaključke koje usvaja Skupština Udruženja i njeno Predsjedništvo, predstavlja dogovorene stavove Udruženja.

Član 24.

Odnosi između Skupštine Udruženja i Predsjedništva Skupštine Udruženja zasnivaju se na jedinstvu i odgovornosti u ostvarivanju zajedničkih ciljeva i zadaća formuliranih u zaključcima Skupštine Udruženja i na načelima međusobne povezatnosti, saradnje, koordinacije za ostvarivanje zadataka koji proističu iz jedinstvene programske orijentacije Udruženja, utvrđene u mandatnom periodu.

Član 25.

Mandat delegata u Skupštini Udruženja, Predsjedništvu Skupštine Udruženja, kao i delegata koje Udruženje delegira u druge organe, traje dvije godine. Skupština Udruženja može zamijeniti izabranog delegata i prije isteka mandatnog perioda pod uslovom i u skladu sa odredbama ovog Statuta i Odluke o načinu izbora i opoziva delegata koju donosi Skupština Udruženja.

Član 26.

Delegat je za svoj rad i djelovanje odgovoran Skupštini Udruženja i organu u kojem je delegat.

Dužnosti i prava delegata su:

- da delegatsku funkciju obavljaju u skladu sa važećim propisima i odredbama ovog Statuta i drugih akata Udruženja,
- da u organima u koje su delegirani iznose stavove i mišljenja članstva koje ih je delegiralo,
- da o svim pitanjima o kojima se raspravlja u organima u koje su delegirani, konsultuju članstvo koje ih je delegiralo i iniciraju zauzimanje stavova i mišljenja koje treba da iznesu organima u koje su delegirani,
- da redovno prisustvuju sjednicama struktura koje su ih delegirale, kao i sjednicama organa u koje su delegirani, te informišu članstvo koje ih je delegiralo o zauzetim stavovima i donesenim odlukama organa u koje su delegirani.

VI ORGANI UDRUŽENJA

Član 27.

Organi Udruženja su:

- Skupština Udruženja,
- Predsjedništvo Udruženja,
- Nadzorni odbor Udruženja,
- Sud časti Udruženja,
- Stalni i povremeni organi i komisije.

SKUPŠTINA UDRUŽENJA

Član 28.

Skupština Udruženja je najviši organ Udruženja.

Skupština Udruženja se konstituira na delegatskom principu.

Kriteriji, način izbora i opoziva delegata, kao i prava delegiranja i broj delegata, određuju se posebnom odlukom Skupštine Udruženja, odnosno Predsjedništva Udruženja, u skladu sa odredbama ovog Statuta.

Skupštinu Udruženja čini 30 delegata.

Član 29.

Skupštinu Udruženja priprema i saziva Predsjedništvo Udruženja.

Skupština se sastaje prema potrebi, a najmanje dva puta godišnje.

Skupština može biti sazvana i na zahtjev jednog od organa Udruženja.

Član 30.

Odluku o sazivanju Skupštine Udruženja i prijedlog dnevnog reda utvrđuje Predsjedništvo Udruženja.

Član 31.

Materijal za sjednice Skupštine Udruženja, Predsjedništvo Udruženja dostavlja delegatima pet dana prije održavanja sjednice.

Skupština Udruženja radi i odlučuje na osnovu svog Poslovnika o radu, koji za cijeli mandatni period donosi na konstituirajućoj sjednici.

Skupština Udruženja punovažno radi i odlučuje, ako sjednici prisustvuje nadvećinska polovina izabranih kandidata.

Izjašnjavanje na sjednici Skupštine Udruženja po pravilu je javno, ali može biti i tajno, ovisno od odluke Skupštine Udruženja.

Član 32.

Skupština Udruženja bira:

- Članove Predsjedništva Udruženja i predsjednika Predsjedništva Udruženja,
- Članove Nadzornog odbora i predsjednika Nadzornog odbora Udruženja,
- Članove Suda časti i predsjednika Suda časti Udruženja,
- delegate za Savez i Predsjedništvo Saveza Udruženja estradnih izvođača Federacije Bosne i Hercegovine i B i H.

Ukoliko se u organe Udruženja predlaže veći broj kandidata od broja koji se bira, izabrani su oni kandidati koji su dobili najveći broj glasova, međutim, ukoliko se u navedene organe predlaže onoliko kandidata koliko se i bira, izabrani su oni kandidati koji su dobili apsolutnu većinu glasova glasačkog tijela.

Član 33.

Skupština razmatra:

- ostvarenje programskog načela;
- stavove o radu organa Udruženja i međusobna prava, dužnosti i obaveze Udruženja i Saveza;
- dopise upućene Skupštini.

Skupština razmatra i usvaja:

- izvještaj o radu Predsjedništva Udruženja;
- izvještaj Nadzornog odbora, kao i drugih organa Udruženja.

Skupština donosi:

- Statut Udruženja, kao i njegove izmjene i dopune;
- poslovnik o svom radu;
- program rada i finansijski plan na prijedlog Predsjedništva Udruženja;
- odluku o udruživanju u Savez;
- odluku u učlanjivanju u druge srodne organizacije u zemlji i inostranstvu;
- odluke o istupanju iz njih;
- odluku o formiranju Poslovnice za obavljanje poslova u interesu članova Udruženja, formiranju disko kuće, radio i TV stanice, privrednog društva u skladu sa Zakonom;
- odluku o prestanku rada i postojanja Udruženja.

Član 34.

Skupština Udruženja raspravlja i odlučuje o drugim pitanjima, ukoliko se o tome izjasni Predsjedništvo Udruženja.

Radom Skupštine Udruženja rukovodi radno predsjedništvo Skupštine Udruženja estradnih izvođača ZE-DO Kantona.

Član 35.

Skupština Udruženja donosi zaključke, preporuke i odluke, predlaže ih organima Saveza Udruženja estradnih izvođača Federacije Bosne i Hercegovine i ostalim strukturama Udruženja, Zeničko-Dobojskom Kantonu i Federacije BiH.

PREDSJEDNIŠTVO UDRUŽENJA

Član 36.

Predsjedništvo Udruženja je kolektivni izvršni organ Skupštine koji čini: Predsjednik i 6 (šest) članova Predsjedništva Udruženja, koji su za svoj rad odgovorni Skupštini Udruženja.

Predsjednici organa prisustvuju sjednicama Predsjedništva Udruženja bez prava odlučivanja.

Izbor članova Predsjedništva Udruženja vrši se u skladu sa Odlukom o strukturi, broju i načinu izbora članova Predsjedništva Udruženja.

Predsjedništvo Udruženja izvršava odluke Skupštine i obavlja poslove koji su utvrđeni ovim Statutom i drugim općim aktima Udruženja, kao i druge poslove koje mu povjeri Skupština.

Predsjedništvo izvršava i realizuje:

- Odluke Skupštine,
- Program rada i finansijski plan za tekuću godinu.

Predsjedništvo razmatra i usvaja:

- Sva tekuća pitanja iz domena djelatnosti Udruženja,
- Prijedloge, sugestije, predstave i žalbe članova Udruženja,
- Izveštaje Komisija i drugih stalnih ili povremenih radnih organa Udruženja.

Predsjedništvo donosi:

- Odluku o sazivanju Skupštine,
- Odluku o prijemu u članstvo, na prijedlog Komisije za prijem novih članova,
- Odluku o dodjeli nagrada i drugih priznanja Udruženja,
- Odluku o raspisivanju oglasa za prijem radnika stručnih službi Udruženja i Poslovnice Udruženja,
- Odluku o rebalansu finansijskog plana,
- Odluku o visini članarine,
- Odluku o osnivanju sekcije,
- Odluku o isključenju iz članstva,
- Odluku o žalbama članova Udruženja.

Predsjedništvo bira:

- Članove Komisija i drugih stalnih ili povremenih radnih organa Udruženja,
- Članove Komisije za prijem u članstvo Udruženja.

Predsjedništvo predlaže:

- Tekst Statuta, kao i njegove izmjene i dopune,
- Tekstove Poslovnika i drugih akata o radu organa Udruženja,
- Odluku o strukturi, broju članova i izboru članova Predsjedništva,
- Odluku o izboru Predsjednika Predsjedništva Udruženja,
- Program rada i finansijski plan za narednu godinu,
- Odluku o udruživanju u Savez i odluku o istupanju iz Saveza,
- Kriterijume izbora Programskog savjeta,
- Kandidate za članove Predsjedništva,
- Kandidate za sastav /potrebne/ delegacije,
- Odluku o prestanku rada i postojanja Udruženja,
- Izmjene zakonskih propisa u cilju unapređenja članova Udruženja.

Predsjedništvo utvrđuje i daje saglasnost:

- Na način organizovanja Stručne službe Udruženja i Poslovnice,
- Na normativna akta i sistematizaciju poslova i radnih zadataka u Radnoj zajednici i Poslovnici,
- Na visinu boda za raspodjelu ličnih dohodaka radnika Stručnih službi, kao i na visinu materijalne nadoknade radnicima u Radnoj zajednici i Poslovnici i za druge poslove koji se obavljaju za Udruženje.

Predsjedništvo Udruženja obavlja i druge poslove koje mu u nadležnost stavi Skupština.

Predsjedništvo Udruženja izvještaje o svom radu podnosi Skupštini.

Predsjedništvo Udruženja radi u sjednicama koje saziva Predsjednik Predsjedništva Udruženja prema potrebi.

Sjednice Predsjedništva Udruženja saziva i njima rukovodi Predsjednik

Predsjedništva Udruženja, a u njegovoj odsutnosti ovlašteni član Predsjedništva Udruženja u saradnji sa Sekretarom Udruženja.

Predsjedništvo Udruženja punovažno odlučuje, ako sjednici prisustvuje više od polovine članova.

Predsjedništvo Udruženja i stručne Komisije imaju pravo na naknadu za svoj rad, ovisno od materijalno-finansijskih mogućnosti Udruženja.

Odluke Predsjedništva Udruženja donose se nadvećinskim glasanjem prisutnih članova, izuzev u slučajevima u kojima je ovim Statutom drugačije predviđeno.

Predsjednik Predsjedništva Udruženja predstavlja Udruženje i njegove organe pred drugim licima i zastupa ih u pravnim odnosima sa trećim licima.

Predsjednik Predsjedništva Udruženja saziva sjednice Predsjedništva Udruženja, njima predsjedava i u saradnji sa Sekretarom Udruženja i članovima Predsjedništva Udruženja usklađuje rad Komisije i drugih stalnih ili povremenih radnih organa Udruženja.

Stara se da rad Udruženja bude u skladu sa Zakonom i drugim propisima, ovim Statutom, kao i zaključcima i aktima organa i tijela Udruženja.

Predlaže dnevni red redovnih i proširenih sjednica Predsjedništva Udruženja i sjednica Skupštine Udruženja.

Član 37.

Predsjednik Predsjedništva Udruženja je dužan da između sjednica Predsjedništva obavlja konsultacije, vrši dogovaranja i razmjenu iskustava i pokreće po inicijativi Predsjedništva određena pitanja pred drugim organima i organizacijama.

Član 38.

Predsjednik Predsjedništva Udruženja je naredbodavac za izvršenje finansijskog plana, prihoda i rashoda Udruženja i on u ime Udruženja potpisuje sva akta i dokumente, ukoliko za pojedina akta ne ovlasti posebno zamjenika predsjednika ili nekog od članova Predsjedništva.

Član 39.

Predsjednik Predsjedništva Udruženja obezbjeđuje zakonitost rada Udruženja i izvršenja Zakonom, ovim Statutom i drugim aktima Udruženja predviđenih obaveza i u vezi sa tim lično je odgovoran Predsjedništvu Udruženja i Skupštini Udruženja.

Član 40.

Članovima Predsjedništva Udruženja i predsjedniku Predsjedništva Udruženja mandat traje 2 (dvije) godine i može obavljati najviše dva mandata. Mandat članova Predsjedništva Udruženja i predsjednika Predsjedništva Udruženja može prestati i prije steka vremena za koje su birani i to:

- usljed smrti;
- ostavke;
- isljučenja iz Udruženja;
- pravosnažne sudske presude u kojoj je osuđen na kaznu zatvora većom od 6 mjeseci;
- opozivom, ukoliko ne izvršava obaveze predviđene ovim Statutom.

Zahtjev za opoziv podnosi Predsjedništvo ili najmanje jedna trećina delegata Skupštine Udruženja, a odluke donosi Skupština većinom glasova izabranih delegata Skupštine Udruženja.

SEKRETAR UDRUŽENJA

Član 41.

Predsjedništvo Udruženja po osnovu raspisanog konkursa bira sekretara Udruženja, koji za svoj rad odgovara Predsjedništvu Udruženja.

Član 42.

Dužnost sekretara Udruženja je:

- da obezbjeđuje blagovremeno provođenje odluka i zaključaka Skupštine i Predsjedništva Udruženja i o tome ih redovno informiše;
- da aktivno učestvuje u pripremanju izvještaja, informacija, pregleda i raznih drugih materijala za potrebe organa Udruženja;
- da koordinira rad Službe zajedničkih poslova i u ime Predsjedništva izdaje naloge kojima se obezbjeđuje pravilno provođenje odluka Predsjedništva Udruženja.

Član 43.

Sekretar Udruženja zaključuje Ugovor o radu sa Predsjedništvom Udruženja kojim se utvrđuju njegova prava i obaveze, među kojima i pravo na plaću za svoj rad.

NADZORNI ODBOR

Član 44.

Nadzorni odbor vrši nadzor nad materijalno-finansijskim poslovanjem Udruženja, prati sprovođenje odredaba Statuta i drugih akata Udruženja. O svom radu Nadzorni odbor podnosi pismeni izvještaj Predsjedništvu i Skupštini Udruženja. Nadzorni odbor vrši i nadzor nad sprovođenjem odluka i zaključaka organa Udruženja i nad radom Službe zajedničkih poslova i Poslovnice Udruženja i svoj rad sprovodi u skladu sa Zakom i normativnim aktima Udruženja.

Skupština Udruženja bira predsjednika i dva člana Nadzornog odbora, a mandat predsjednika i članova Nadzornog odbora traje 2 (dvije) godine i mogu obavljati najviše dva mandata.

SUD ČASTI

Član 45.

Sud časti se sastoji od predsjednika i dva člana koji rade na osnovu Kodeksa društvenih i profesionalnih normi rada i ponašanja članova Udruženja estradnih izvođača.

Sud časti bira Skupština Udruženja čiji mandat traje 2 (dvije) godine i mogu obavljati najviše dva mandata.

Član 46.

Organ, odnosno komisija ili druga tijela, za koja se utvrdi da nije radio u skladu sa odredbama ovog Statuta, kao i drugih općih akata, može biti opozvan u cijelini ili djelimično, a što ne isključuje i druge vrste odgovornosti.

Član 47.

Odgovornost svakog člana utvrđuje Sud časti Udruženja.

Postupak se sprovodi samostalno, te po završenom postupku donosi slijedeće mjere:

- kritika organa Udruženja;
- usmenu opomenu;
- pismenu opomenu;
- zabranu vršenja izbornih funkcija u trajanju od četiri godine;
- isključenje iz Udruženja.

Član 48.

Iz članstva Udruženja može se isključiti član:

- koji ne ispunjava odluke Statuta Udruženja i druge obaveze,
- koji radi protiv interesa i ugleda Udruženja

- koji ne izvršava odluke organa upravljanja Udruženja,
- koji narušava kodeks estradnog izvođača.

O isključenju člana Udruženja odlučuje Sud časti, nakon što utvrdi da su se stekli uslovi za donošenje takve odluke.

Odluka o isključenju mora se pismeno predati isključenom članu.

Protiv ove odluke o isključenju, član ima pravo žalbe u roku od 15 dana od prijema iste Predsjedništvu Udruženja koje donosi konačnu odluku.

VII KADROVSKA POLITIKA

Član 49.

U ostvarivanju utvrđenih principa kadrovske politike, Udruženje će obezbjediti da se na odgovorne funkcije i organe predlažu i biraju kadrovi koji imaju potrebne stručne i radne kvalifikacije, a koji se po svojim moralno-političkim opredjeljenjima i ponašanju ističu kao dosljedni borci za ravnopravni kurs i politiku F BiH, progres društvenog pokreta, koji uživaju ugled i povjerenje sredine u kojoj žive.

Član 50.

O izabranim članovima na rukovodne funkcije u Udruženju, sprovodi se konsultacija u Ministarstvu za obrazovanje, nauku, kulturu i sport ZE-DO Kantona.

VIII SLUŽBA ZAJEDNIČKIH POSLOVA

Član 51.

Obavljanje stručnih administrativnih, materijalno finansijskih, tehničkih i drugih poslova i zadataka, Udruženje vrši putem svoje Službe zajedničkih poslova.

Član 52.

Međusobni odnosi Udruženja i Službe zajedničkih poslova utvrđuju se posebnim općim aktima koji regulišu broj izvršilaca za obavljanje poslova i radnih zadataka u Službi / Pravilnik o sistematizaciji i organizaciji poslova, Pravilnik o radu /.

Sva prava i obaveze iz radnog odnosa, uposlenici Službe zajedničkih poslova ostvaruju u skladu sa Zakonom i normativnim aktima Udruženja.

Član 53.

Za koordinaciju poslova između Službe zajedničkih poslova i organa Udruženja odgovoran je Sekretar Udruženja.

IX IMOVINA UDRUŽENJA I FINANSIJSKO-MATERIJALNO POSLOVANJE

Član 54.

Imovinu Udruženja čine:

- sredstva iz budžeta ZE-DO Kantona,
- sredstva od naplate članarine,
- sredstva od dobrovoljnih priloga i donacija fizičkih i pravnih lica,
- prihodi od kamata, dividendi, dobiti od kapitala, zakupnina, honorara i sličnih izvora pasivnih prihoda,
- prihodi stečeni obavljanjem privredne djelatnosti,
- drugi prihodi stečeni u skladu sa Zakonom i Statutom.

Član 55.

Nadzor nad namjenskim korištenjem i raspolaganjem sredstvima Udruženja vrši organ Udruženja određen Statutom.

Član 56.

Udruženje je dužno uredno voditi poslovne knjige i sastavljati finansijske izvještaje u skladu sa Zakonom i drugim propisima.

Član 57.

Organi Udruženja dužni su upravljati imovinom Udruženja sa pažnjom dobrog domaćina.

Ako Udruženje obavlja privrednu djelatnost, u skladu sa odredbama ovog Zakona, članovi upravnog odbora dužni su upravljati imovinom koja se koristi za obavljanje te djelatnosti s pažnjom dobrog privrednika.

Član 58.

Finansijsko-materijalno poslovanje Udruženje obavlja na način i postupcima utvrđenim Zakonom i Statutom Udruženja.

Pravilnik o finansijsko-materijalnom poslovanju donosi Predsjedništvo Udruženja.

Finansijsko-materijalno poslovanje Udruženja kontroliše Nadzorni odbor Udruženja.

Član 59.

Udruženje svake godine donosi završni račun za proteklu godinu i finansijski plan za narednu godinu, koji se usvaja na sjednici Skupštine Udruženja.

X PRELAZNE I ZAVRŠNE ODREDBE

Član 60.

Udruženje prestaje sa radom odlukom Skupštine Udruženja.

Po prestanku rada Udruženja, preostala imovina raspoređuje se shodno odluci nadležnog organa Udruženja, u skladu sa odredbama Statuta.

Ukoliko nadležni organ Udruženja ne donese odluku o raspodjeli imovine do dana brisanja iz registra, Federalno Ministarstvo, odnosno kantonalni organ donijet će odluku o raspodjeli preostale imovine drugom Udruženju registriranom u Federaciji koje obavlja istu ili sličnu statutarnu djelatnost.

Član 61.

Tumačenje odredaba ovog Statuta daje Predsjedništvo «Udruženja estradnih izvođača ZE-DO Kantona».

Član 62.

Skupština Udruženja donosi izmjene i dopune Statuta i druge akte određene Statutom, po istom postupku kao i donošenje Statuta, a na prijedlog Predsjedništva Udruženja.


Član 63.

Ova Statut i drugi opći akti objavljuju se u Biltenu Udruženja, tako da bude dostupan svakom članu «Udruženja estradnih izvođača ZE-DO Kantona».

Član 64.

Ova Statut stupa na snagu danom usvajanja na Skupštini «Udruženja estradnih izvođača ZE-DO Kantona» održanoj 09.03.2004. godine.

Zenica, 09.03.2004. godine
Broj: 03/04



PREDSEDAVAJUĆI SKUPŠTINE

/ Josip Dujmović /